

UCAPAN PERDANA MENTERI DI MAJLIS MAKAN
MALAM SEMPENA LAWATAN KE NEGERI PAHANG
DI KEDIAMAN MENTERI BESAR, KUANTAN, PAHANG
PADA 24HB MEI, 1980

Yang Amat Berhormat, Tuan Haji Abdul Rahim Bakar, Menteri Besar Pahang, Yang Berhormat, Ahli-ahli Majlis Kerja Kerajaan Negeri, Ahli-ahli Yang Berhormat, Ketua-Ketua Parti Komponen Barisan Nasional Negeri Pahang, Ketua-Ketua Jabatan dan Ketua-Ketua Kaum, Tuan-tuan dan Puan-puan sekalian.

Saya mengucapkan syukur kehadiran Allah Subhanahu Wataala kerana dengan kurnia dan izin-Nya dapat saya melakukan lawatan ke negeri Pahang Darul Makmur. Di samping dapat berkenalan dan beramah mesra dengan rakyat dan penduduk dapat juga saya menyaksikan kemajuan yang telah dicapai serta mengetahui sedikit sebanyak masalah-masalah yang dihadapi oleh rakyat dan Kerajaan.

Ini bukanlah kali pertama saya melawat negeri Pahang. Saya telah pergi ke Jengka dan juga beberapa kali datang ke Kuantan. Tetapi dalam rangka lawatan saya kali ini, program yang diatur adalah lebih menyeluruh. Pagi ini saya telah diberi taklimat mengenai pembangunan dan kemudiannya melawat projek perumahan di Batu Tiga. Esok saya akan melawat Bukit Ibam di Pahang Tenggara serta melawat Kompleks Kayu Kayan di Mentiga.

Tuan-tuan dan Puan-puan sekalian,

Pahang mempunyai sumber alam semula jadi yang banyak yang boleh digunakan untuk memesat dan mempergiatkan lagi pembangunan serta meningkatkan lagi pertumbuhan ekonomi di negeri ini. Dengan kegigihan dan kesungguhan pucuk pimpinan negeri menggunakan sumber-sumber ini dengan jujur, proses kemajuan bagi negeri ini dapat dipertingkatkan dan dipercepatkan lagi. Saya berharap semua pihak memahami hakikat ini dan mereka mestilah bekerjasama dengan Kerajaan Negeri.

Usaha-usaha memperkemaskan yunit perancangan ekonomi negeri dengan diketuai oleh seorang pegawai yang berpengalaman dari Bahagian Perancang Ekonomi, Jabatan Perdana Menteri,

adalah satu langkah yang baik yang boleh memperhebatkan lagi perancangan di negeri ini. Usaha ini saya diberitahu adalah dalam konteks memperkemaskan keseluruhan jentera Kerajaan. Pelan induk yang sedang disediakan oleh yunit ini dengan orientasi yang menekan pembasmian kemiskinan secara menyeluruh akan dapat memberi faedah yang lebih meluas kepada seluruh rakyat, terutamanya mereka yang kurang bernasib baik.

Saya juga bangga dengan pencapaian yang telah dijalankan oleh Kerajaan Negeri Pahang dalam pelaksanaan rancangan perumahan. Kerajaan telah dapat menyiapkan 86.9 peratus daripada projek-projek perumahan yang dirancangan di bawah Rancangan Malaysia Ketiga. Saya difahamkan dari jumlah 23 ribu yunit yang telah disiapkan oleh agensi-agensi Kerajaan, 95 peratus daripadanya adalah rumah yang berharga kurang daripada \$20,000.00 seyunit. Pencapaian matlamat ini merupakan satu kejayaan yang besar dan sejajar dengan semangat manifesto Barisan Nasional. Saya harap Kerajaan Negeri akan terus memberi perhatian yang berat terhadap keperluan perumahan bagi golongan yang berpendapatan rendah.

Saya juga bangga dengan usaha Kerajaan Negeri untuk memajukan sektor perindustriannya. Hingga ini lapan buah kawasan perindustrian seluas 1,416 ekar telah dibuka. Lebih 40 peratus daripada seluruh kawasan perindustrian yang telah dibuka itu telahpun diambil oleh pengusaha-pengusaha. Penubuhan industri dan kilang di kawasan ini telah mewujudkan lebih 7,000 peluang pekerjaan. Usaha-usaha Kerajaan Negeri untuk meluaskan perkembangan sektor perindustriannya dengan membuka beberapa kawasan perindustrian yang lain serta menyediakan kemudahan infrastruktur dan perkhidmatan adalah satu langkah yang baik yang patut diberi perhatian. Dalam hal ini Kerajaan Persekutuan akan memberi sokongan dan bantuan yang diperlukan oleh Kerajaan Negeri supaya usahanya hendak menempatkan lebih banyak lagi industri-industri di Negeri Pahang dapat menarik minat pengusaha-pengusaha.

Tuan-tuan dan Puan-puan sekalian,

Keseluruhan usaha pembangunan yang sedang dirancang dan dilaksanakan tidak akan dapat mencapai matlamat yang diharapkan jika keadaan politik tidak stabil dan ancaman kepada keselamatan tidak dihapuskan. Kestabilan politik memang boleh mempengaruhi keadaan keselamatan. Itulah sebabnya dalam usaha kita

memesat dan mempergiatkan lagi pelaksanaan pembangunan kita mestilah berusaha bagi menjamin dan mengawal keadaan keselamatan supaya keamanan dan ketenteraman sentiasa wujud. Dalam hubungan ini saya merasa sukacita bahawa dengan kesungguhan Pengarah Gerakan Negeri dan usaha yang tidak putus-putus Jawatankuasa Keselamatan Negeri, keadaan keselamatan di negeri ini adalah terkawal. Pahang telah dapat membendung ancaman dari penganas kominis yang cuba menapak semula di negeri ini dari masa ke semasa.

Saya mengucapkan tahniah kepada anggota-anggota pasukan keselamatan di atas kejayaan cemerlang mereka menghapuskan sembilan orang penganas kominis di Kawasan Bentong dalam bulan Mac yang lalu. Saya difahamkan bahawa 14 orang yang lain telah juga ditangkap dalam gerakan itu. Dalam tahun lalu seramai 9 orang penganas kominis telah dihapuskan, dua ditangkap dan 6 orang yang lain menyerah diri. Kejayaan-kejayaan yang telah dicapai ini amatlah menggalakkan. Saya menggesa seluruh rakyat supaya memberikan kerjasama sepenuhnya kepada Jawatankuasa Keselamatan Negeri dan pasukan keselamatan dalam gerakan dan tindakan mereka menghapuskan saki-baki penganas-penganas kominis di negeri ini.

Tuan-tuan dan Puan-puan sekalian,

Usaha-usaha pembangunan yang besar yang sedang dirancang oleh Negeri Pahang memerlukan bukan sahaja keyakinan dan penyertaan rakyat, bahkan suatu jentera pentadbiran yang jujur, kemas dan dinamis. Kedua-duanya pula berkehendakkan kepimpinan politik yang dedikasi, jujur dan gigih. Usaha-usaha yang lebih hendaklah dijalankan bagi meningkatkan lagi kestabilan dan keharmonian politik di Negeri Pahang. Semua pihak hendaklah memainkan peranan yang lebih positif dan aktif bagi menjamin kestabilan yang tulen dan berterusan dari kepentingan kemajuan serta kepentingan keselamatan Negeri Pahang.

Saya penuh yakin dengan sokongan dan kerjasama semua pihak Kerajaan yang dipimpin oleh Tuan Haji Abdul Rahim Bakar boleh melipatgandakan usaha-usaha yang jujur dan gigih untuk membawa Negeri Pahang ke suatu peringkat yang boleh menandingi lain-lain negeri yang maju di Malaysia. Saya menggesa seluruh rakyat di semua peringkat dan golongan supaya menunaikan tanggungjawab mereka masing-masing bagi mencapai hasrat dan cita-cita murni ini.

Akhirnya, saya sekali lagi mengucapkan berbanyak terima kasih serta setinggi-tinggi penghargaan kepada semua pihak yang telah sama-sama menjayakan lawatan saya ini. Saya mendoakan setiap rakyat dan penduduk Negeri Pahang selamat maju jaya.